

**TEZAUUR LITURGIC**  
**24 DECEMBRIE**

**ACATISTUL**  
**SF. CUVIOS**  
**PETRU**  
**KOLPAKOV**  
**DE LA CIAGRIN**



**MOSCOVA, 2000**



# **Акафист святому праведному Петру Чагринскому**

## **Кондак 1**

Возбранный чудотворче и угодниче Христов,  
скорый помощниче и заступниче наш,  
праведный отче Петре, яко имея дерзновение ко  
Господу, от всяких нас бед свободи, да зовем ти:  
Радуйся, праведне отче Петре, скорый  
помощниче в бедах наших.

## **Икос 1**

Ангелов Творец избра тя измлада и указа ти  
путь, ведущий ко спасению, его же поведал еси  
миряню сам преподобный Серафим. Мы же,  
вспоминиюще добродетельное житие твое,  
восхваляем тя сице:

Радуйся, яко измлада пребывавый во глубоком  
смирении;

радуйся, благочестивых родителей утешение.

Радуйся, образе послушания;

радуйся, наученный искреннему покаянию.

Радуйся, в сердце от юности Бога имевый;

радуйся, ради Христа насмешки терпевый.

Радуйся, образе кротости и смирения;

радуйся, с Богом всегда пребывавый во

уединении.

Радуйся, праведне отче Петре, скорый помощниче в бедах наших.

### **Кондак 2**

Видящи мати твоя теплую любовь твою ко Господу, возжелала всем сердцем привести тебя к истинней христианской жизни. И более пеклася о том, дабы имети тебе друзи духовнии, кои творят волю Божию и Ему непрестанно со умилением взывают: Аллилуиа.

### **Икос 2**

Разум небесный тебе даровася, праведне отче, от самой бо юности всегда ты стремился еси ходити во храм Божий в селении Старый Буян. И молился прилежно со умилением и стоял еси аки свеща, даже вернии дивляхуся, како научен воздавати молитвы ко Господу. Сего ради и мы вопием ти сице:

Радуйся, земли Самарския богоизбранное чадо; радуйся, житию праведных поревновав измлада.

Радуйся, матери своея приявый добрая наставления;

радуйся, получивый от нея к чистому житию благословение.

Радуйся, молитвенное правило строго

соблюдавый;  
радуйся, воздержание в пищи и питии такожде  
не нарушавый.  
Радуйся, понедельник, среду и пяток постными  
днями хранивый;  
радуйся, к чистыя жизни мнозе ревнивый.  
Радуйся, праведне отче Петре, скорый  
помощниче в бедах наших.

### **Кондак 3**

Сила Вышняго даде тебе, отче Петре, в глубокой  
нощи жития сего освещати светом разума. Ты  
же, Духом Божиим просвещенный, всегда  
пребывал еси в молитве Иисусовой, мня себе  
хуже и ниже всех, и вел велию борьбу со  
страстьми и похотьми. И вернии людие, видяще  
сия, почитаху тя, яко праведника, ибо по твоему  
совету все в точности совершахуся, и за сие  
благодарными усты вопияху ко Господу:  
Аллилуиа.

### **Икос 3**

Имея в душе и сердце веру в Единого Бога и  
силу Его, шествовал с радостию непоколеблемо,  
по старческому преданию жизни святой, строго  
исполняя все обычаи Святой Соборной  
Апостольской Церкви. Вернии людие за твое  
богоугодное житие прилепляхуся к тебе, аки к

путеводителю, и ты указывал еси другим сия же заповеди, коим учили тя святии отцы и Церковь.

И дивляхуся таковому о тебе промышлению возносим и мы к Богу о тебе сия похвалы:

Радуйся, Христа Спасителя всей душой возлюбивый;

радуйся, сердце и ум в молитве крепко к Нему утвердивый.

Радуйся, духовного отца никогдаже ослушатися дерзнувший;

радуйся, мир и его суету всю презревый.

Радуйся, никогдаже нарушил еси ни праздничных дней, ни воскресных;

радуйся, никогдаже для других не жалел еси сил телесных.

Радуйся, предан ты быв до кончины своея токмо Богови;

радуйся, взявше свой крест, шествовал еси тою же дорогою.

Радуйся, праведне отче Петре, скорый помощниче в бедах наших.

#### **Кондак 4**

Бурю мирскаго жития утишая, сам шел еси узким путем, неленостно работая Богови, во мнозе долготерпении и смирении, ведуще за собою духовные чада своя, кои к тебе прилепляхуся по Бозе. Ты же, утверждая братию

свою в истинной православной вере, наставлял шествовати крепце и исполняли свято вся ея заповеди по совести, и едиными усты и сердцем пети Богови: Аллилуиа.

### **Икос 4**

Слышаще и внимающе, како наставлял еси ты, отче, жити, вернии человецы Самарския земли, следоваху за тобою и поучахуся о твоих словесех и подвизах. Людие бо бяху разного возраста и звания к тебе притекаху и аки медом услаждахуся, како глаголал еси о Бозе, сего ради и мы с любовью вопием ти тако:

Радуйся, чистоты душевныя и телесныя усердный хранителю;

радуйся, в наставлениях по Бозе неутомимый учителю.

Радуйся, к Богу о нас неусыпный молитвенниче; радуйся, паствы твоея истинный и добрый наставниче.

Радуйся, яко всех, призывающих тя, от напастей избавляеши;

радуйся, и нам искушений диавольских избегнути помогаеши.

Радуйся, святоотеческим правилом усердно подражающий;

радуйся, любовь Божию к верным привлекающий.

Радуйся, праведне отче Петре, скорый помощниче в бедах наших.

### **Кондак 5**

Божественный свет просвети тя, отче, и Духом Святым озарен быв свыше пути спасительному поучал еси. И восходя благодатию Божиею от силы в силу, вел еси за собою всех тех, кои жаждущи душевного спасения, внимали твоему душеполезному учению, ведая образ твоего чистаго жития. Молитвенно к тебе припадающе, со благодарением вопием дивному во святых Своих Богу: Аллилуиа.

### **Икос 5**

Видя в тебе, отче Петре, пастыря добраго, из мнозех селениих, ближних и дальних, к тебе текоша за добрым советом и помощью. Ты же усердно внимал еси сим людям, пася их прилежно и нужды их исполняя, и за все повелевая благодарити Творца всея твари. Тем же и мы, тя почитающе, ублажаем зовуще:  
Радуйся, своею жизнью путь ко спасению нам открывающий;  
радуйся, своими молитвами верных с Богом всегда примиряющий.  
Радуйся, общее житие не имеющим крова в миру устрояющий;

радуйся, вдов и сирот в них вселяющий.  
Радуйся, подвизающимся на диавола и  
просящим тебя помогающий;  
радуйся, крепким оружием их ограждающий.  
Радуйся, земли Самарския ты покровителю;  
радуйся, идущих за тобою по Бозе ты всех  
окормителю.  
Радуйся, праведне отче Петре, скорый  
помощниче в бедах наших.

### **Кондак 6**

Проповедуют людие сие богоугодное житие, кое  
благословил еси для мирских человек сам  
Саровский чудотворец. Тако и ты, отче Петре,  
шел еси, ревнуя о благочестии. Плоть твою  
духови поработил еси постом, молитвою и  
добрым деланием. От малого до велика поучая,  
како грех рождается и како его победити. О сем  
и мы, надеющиеся на твое заступление, святе  
Петре, благодарственно взываем Богови:  
Аллилуиа.

### **Икос 6**

Возсиял еси, блаже, добротою души твоя к  
людем. Во твоем бо селении, идеже ты пребывал  
еси, отче, тамо бо не бе близ Божественного  
храма, дабы ходити верным и молитися Богу. Ты  
же, отче, возжелал еси построити православную

церковь в Чаграх. И Господь дарова ти велий разум, како и что подобает ти делати. Ты же многажды сам, даже нощию, ускорял своею помощию ея строение. Сего ради со умилением зываем ти сице:

Радуйся, делателям святаго храма помогающий;  
радуйся, и другия верныя к сему труду сподвизающий.

Радуйся, Бога всегда призывающий;  
радуйся, от Него невидимую помощь получающий.

Радуйся, по построении храма иконы приобретающий;  
радуйся, чтецами и певцами чад духовных утверждающий.

Радуйся, храм Божий всегда посещающий;  
радуйся, во время богослужения ум свой с Богом соединяющий.

Радуйся, праведне отче Петре, скорый помощниче в бедах наших.

### **Кондак 7**

Хотя всемилостивый Господь явити в тебе, блаженне, благодать Свою, яко избраннику Своему, дарова тебе благоугождати Ему. Ты же, отче, возлюбил еси Господа твоего паче всего мира и ближняго своего, аки и себе. И бе писано, яко ты, отче, единойжды, видя сироту на

поле сеюща семя, с трудом носившаго лукошко и неумело рассеявшаго своею детскою рукою, ты же, оставив загон свой, поспешествовал еси ему на помощь, и, с молитвой на устах поработав ему до полудня, затем возвратился еси на свое делание. Отрок сей с любовью, в благодарности воспел еси Богу: Аллилуиа.

### **Икос 7**

Видяще тя пастыря и учителя Истины, в мире страстном среди всех живуща и ведущаго путь спасительный, течаху к тебе, отче, благоразумнии людие. Ты же, ни единого отринув, всех с радостию и любовью принимал еси, тем помоществуя. И мы, радуящеся таковому промыслению Божию о тебе, взываем ти тако:

Радуйся, столпе православия непоколебимый;  
радуйся, уставы церковные строго хранивый.  
Радуйся, маловерных людей в храм Божий направляющий;

радуйся, все сомнения с пастырем разрешающий.

Радуйся, помощниче в немощи лежащих;  
радуйся, посетителю скорбных и болящих.

Радуйся, мудрый к Богу путеводителю;  
радуйся, заповедей Господних верный исполнителю.

Радуйся, праведне отче Петре, скорый помощнице в бедах наших.

### **Кондак 8**

Дивное чудо видим на тебе, праведне отче. Облече бо тя Господь силою Своею свыше и даде ти дар пророчества и исцеления. Целил бо еси язи и недуги, и беснование различное. Сила же Божия управляла еси тобою, и мнозии людие чрез тебе улучаху от Бога велию милость. Молитвами твоими и наша сердца любовью к Богу просвети, да и мы воспоем Ему с тобою: Аллилуиа.

### **Икос 8**

Благодатию Божественною просвещаем, праведне Петре, име бо пасомое стадо верных, крепко отревал их от путей погибельных и зорко бдел еси над своими овцами, яко истинный пастырь, и кормил еси хлебом душевным и телесным вся приходящая к тебе и врученное тебе стадо. С ними же и мы, во гресех житие свое иждивше, вопием ко Господу таковая: Радуйся, о нас усердный молитвенниче; радуйся, мудрый по Бозе наставниче. Радуйся, ходатаю о нашем спасении; радуйся, наставляяй грешных ко исправлению. Радуйся, нощному бдению в молитве нас

научивый;  
радуйся, пустословити и празднословити  
верным воспретивый.  
Радуйся, любовь к Богу и веру в нас  
насаждающий;  
радуйся, темный мрак наших душ освещающий.  
Радуйся, праведне отче Петре, скорый  
помощниче в бедах наших.

### **Кондак 9**

Все естество небесных сил радовашеся, како в  
земли Самарской явился еси, праведне Петре,  
светяще своею жизнью, направляюще верных к  
Церкви Божией и пастырям ея. И научаше жити  
в чистоте и правде и прославляше Господа Бога  
своими добрыми делами и пети Ему взывая:  
Аллилуиа.

### **Икос 9**

Витии многовещанные не довлеют, отче, к  
достойной тебе похвале, всего себе предал еси на  
служение Богу и людем, живущим по заповедям  
Божииим, и хранил еси верных под Господним  
покровом, дабы лукавый не совратил с  
истиннаго пути и не внушил коего сомнения в  
жизни по Бозе. Сего ради благодарственно  
зовем ти:  
Радуйся, благ временных и вечных пред Богом

ходатаю усердный;  
радуйся, болящим врач милосердный.  
Радуйся, над духовными чадами строго бдящий;  
радуйся, к Божией жизни их приводящий.  
Радуйся, многие людие в духовном разуме  
просветивший;  
радуйся, добродетелями себе украсивший.  
Радуйся, молитвенниче пред Богом чудный;  
радуйся, провидец дивный и мудрый.  
Радуйся, праведне отче Петре, скорый  
помощниче в бедах наших.

### **Кондак 10**

Спасения душевнаго ты всем желая еси, отче, и даже пред самою кончиною своею глагола еси верным: "Любите друг друга и соблюдайте вся заповеди Господни; людие бо, видяще вашу добрую жизнь, прославят вас и Отца вашего, сущаго на небесех, и воспоют Ему песнь: Аллилуиа".

### **Икос 10**

Стены? каменная крепльше бе любовь твоя, святе, к Богу. До последняго твоего въздыхания сокрушался о своих делех, причащался бо и соборовался еси, прося слезно прощения у Бога, и, скончавше свое житие тихо, почил еси от сей временной жизни. Мы же, видяще сие, вопием

ти:

Радуйся, до последняго въздыхания Имя Божие тобою призывашеся;

радуйся, праведною кончиною скончевашеся.

Радуйся, в послушании Церкви поживший;

радуйся, верным ты людям всю жизнь послуживший.

Радуйся, грешником кающимся пред Богом предстателю;

радуйся, душ и телес скорый врачевателю.

Радуйся, людям просящим ты скорый помощниче;

радуйся, всем ты заблудшим по вере наставниче.

Радуйся, праведне отче Петре, скорый помощниче в бедах наших.

### **Кондак 11**

Пение непрестанное возносим ко Господу за добраго наставника и учителя Истины, за ревностного хранителя православия и строителя Божиего храма. По кончине бо его тело погребоша в ограде церкви, кую сам построил в селении Чагры. Благодарни бо Господеви за таковую Его милость к нам недостойным, выну зовем Ему: Аллилуиа.

## Икос 11

Светозарным светом просияша мощи твоя у храма Покрова Божия Матери. Егда же сгореша церковь, и мощи твои нетлении принесени быша на ино место в сем же селении, и по тридесятичетырех летех принесени и селение Красные Ключи в ограду Архангельского храма. Тем же благодаря Бога за сие, воспеваем ти сице:

Радуйся, от святых мощей твоих многая чудесная исцеления болящим источаяй;  
радуйся, от страстей благодатию, данною ти от Бога, души наша свободяяй.

Радуйся, праведне отче Петре, престолу Царя Небеснаго предстояй;

радуйся, о грешнем роде человечестем молитву пред Ним возносяй.

Радуйся, слезы и воздыхания скорбящих с любовью утворяяй;

радуйся, прошения труждающихся и обремененных скоро исполняюяй.

Радуйся, яко всем помощь посылаюяй;

радуйся, из людей страждущих бесы изгоняюяй.

Радуйся, праведне отче Петре, скорый помощниче в бедах наших.

## **Кондак 12**

Благодать Божию, оставление грехов и исправление жития испроси нам, святе отче, у Господа, яко имея бо к Нему дерзновение, да не бесплодно будет семя духовное, кое ты в нас сеял еси. Но да прозябнет и даст добрый плод. И молися за нас ко Всевышнему, дабы до кончины наша в истинней христианской вере пребыли есмы, денно и ношно пребывая с Богом и в сердце поюще Ему: Аллилуиа.

## **Икос 12**

Поюще твое прославление, ублажаем тя, праведне Петре, яко молитвенника о нас пред Господем и, благодаряще Бога, славим тя, отче, за твой великий подвиг, его же совершил еси ради сохранения веры православной на Руси. Сего ради и мы восхваляем тя и взываем тако: Радуйся, воздержанной жизнью своею ты верным светивый; радуйся, во всем и всегда им примером бывый. Радуйся, преподобного Серафима наставления хранящий; радуйся, целителю недужных и болящих. Радуйся, яко вся концы земли Самарския своею любовью объявый; радуйся, в глаголах своих Творца величавый. Радуйся, временныя наши скорби облегчающий;

радуйся, и на Страшном Судище за надеющихся на тебе заступающий.

Радуйся, праведне отче Петре, скорый помощниче в бедах наших.

### Кондак 13

О, предивный наставниче и учителю, святыи праведный отче Петре, прими малое сие моление наше, с любовью тебе приносимое, и избави нас от скорбей и болезней и от всяких бед. И умоли Господа нашего Иисуса Христа, да помилует нас в день судный. Да выну поем Ему: Аллилуиа.

